

Sier Moixè Venier, fo provedador al Sal, qu. sier Moixè.

Sier Troian Bolani *el grando*, qu. sier Hironimo.

Sier Francesco Foscari, fo savio dil Consejo, qu. sier Filippo procurator.

Sier Gabriel Moro el cavalier, è di Pregadi, qu. sier Antonio.

Sier Andrea Magno, fo consier, qu. sier Stefano.

Fu posto, per sier Andrea Gritti procurator, sier Polo Capelo el cavalier savii del Consejo, e sier Francesco da cà da Pexaro savio a Terra ferma, atento la importancia di la cità nostra di Corphù, et per metterla in forteza et compir le fabbriche, sia electo per scurtinio in questo Consejo uno Provedador a Corfù, con ducati . . . al mexe per spexe, meni con se inzegneri e altri, *ut in parte*.

Fu per sier Domenego Trivixan el cavalier procurator, e sier Lunardo Mozenigo, savii del Consejo, messo voler la parte predita, con questo il Provedador sarà electo habbi *solum* per spexe ducati 60 al mexe etc.

Fu, per sier Alvixe di Prioli, savio dil Consejo, messo: atento sier Bernardo Soranzo, è electo baylo a Corfù et dia intrar in rezimento a dì primo Novembre proximo, che 'l predito sia ubligato partirsi in termine di zorni 20 con inzegneri etc., e vadi e sii provedador a Corfù fino l'entrerà in el baylato con ducati 40 al mexe per spexe, e debbi tenir conto di la spexa e sollicitarla etc., *ut in parte*, e intrado sia Baylo, non habbi più li ducati 40.

Fu, per sier Lunardo Contarini e sier Carlo Capello savii ai Ordeni, messo che 'l si elezi uno Provedador a Corfù a lo efecto soprascrito, con ducati 40 al mexe per spexe, qual sia electo per scurtinio in questo Consejo.

Et lete le dite parte, il resto di Savi, manchava sier Alvise da Molin per esser amalato, nulla messeno. Ma sier Bortolo da Mosto andò in renga dicendo non li pareva niuna di queste parte fusse al bisogno, et che lui voleva meter una parte et opinion, et la disse, qual è in questa sustanzia:

226 \* Che 'l sia armado 4 galie bastardele, su le qual sia 50 schiavoni, zoè piameri, *videlicet* che voga primo al bancho, il resto di homeni di trivixana, padoana e lago di Garda, fino al numero di . . . per galia, e posti *etiam* provisionati 20 suso per galia. *Item*, sia electo per scurtinio in questo Consejo uno Provedador zeneral, qual monti su dite galie, le qual

siano soto di lui, et habi jurisdizion civil e eriminal con certe condition; il qual vadi a Corfù, Zante, Zefalonia e dove achaderà a far fortifichar etc. Sia posto per galia 4 nobeli di anni 25 l'uno, uno di qual sia electo per il Capitano over Soracomito sarà su la galia, li altri tre siano electi per scurtinio in el Consejo di Quarantia; i qual nobeli habino ducati 100 per uno: et questo per operarli dove achadesse. El qual Provedador, da esser electo zeneral, habi ducati 1200 a l'anno per spexe; con altre clausole *ut in parte*, la copia de la qual, *fortasse*, noterò qui soto.

Andò in renga poi sier Andrea Gritti procurator, et parlò per la sua parte, laudando proveder e fortifichar Corfù e mandar Provedador di autorità. Li rispose sier Alvixe di Prioli savio dil Consejo, per la sua parte; poi parlò sier Polo Capello el cavalier per la soa parte ch'è quella del Gritti, comemorando sier Vettor Capelo suo padre fo provedador zeneral, et dei provedadori fo mandà in la Morea et a Negroponte a fortifichar quel luogo sier Nicolò da Canal dottor fo poi capitano zeneral, exortando si mandasse Provedador di reputation, et fosseno do li a Corfù. Poi li Consieri introno in l'opinion di sier Alvise di Prioli, et sier Lucha Trun consier andò in renga et parlò et fe' una bona renga, et a la parte di sier Bortolo da Mosto disse non li pareva dir molte parole perchè l'era l'archa di Noè, concludendo si mandasse homeni che atendesse a compir le fabbriche, laudando sier Nicolò Vendramin fo rector a Trevixo sollicitava la fabrica, et cussi sier Polo Nani è rector al presente, e non mandar homeni di reputation, et che a Negroponte fo mandà provedador che fe' far muri senza fondamente e il Turcho con le soe bombarde li butono zoso, laudando la parte dil Prioli. Et sier Antonio Condulmer, sier Nicolò Dolfin, sier Francesco Donado el cavalier savi a Terra ferma, introno in la opinion di sier Alvixe di Prioli; *etiam* sier Vincenzo di Garzoni e sier Hironimo Querini savi ai ordeni, *etiam* il resto di Savii ai ordeni non introno in alcuna parte. Andò le parte: di do Savi ai ordeni 2, dil Mosto 11, dil Trivixan e Mozenigo 11, dil Gritti e altri 23, di Consieri e Prioli 135, et questa fu presa. Nè altro fu fato.

Noto. In questa matina li Avogadori extraordinarii, justa la parte, fono in Colegio, et mostrò li libri, et afermano non aver conzo con alcun sia stà ministro di la Signoria nostra, et Nadal Jacinti, atende a li Extraordenarii, aver pagà assa' danaro *de plano*.

In questo Pregadi, fu posto, per li Consieri, Cai 227 di XL e Savi: che a l'orator di Franza sia donato el